

利津縣志卷第八

孝友列傳第一

李端仁義鄉人父敬義明宣德間以罪配口外開平衛端年六歲日夜擊登聞鼓請以身代上聞而嘉之許之代歷四十餘年因親老歸養以子鵬替役比親歿毀悴逾禮人歎其孝卒年七十九許棠宏治間貢士父果成化戊子舉人任吉州州判父卒三年廬墓次後任甯鄉知縣以父嘗欲造文廟禮器遂捐俸易銅冶器以成父志

李維則增生初名世則性純孝母病夜半思食鹿脯不能得乃割股肉進之母食而愈歲試搜檢解衣襪疤裂血湧文宗詢其故具以對爲嗟歎久之更名之曰維則扁其門曰孝行可風撫按復給穀二十石以示獎

利津縣志

孝友列傳第一

一

卷八

趙垺性至孝崇正壬午父城居遭疾垺出而延醫適土寇至城陷父已出城垺弗知也越城救父遇害

趙著字文綱世佑子好學不厭性純孝父晚歲患風痺轉側需人著衣不解帶涉六寒暑無間事母曲體無違與兄華相友愛自奉極儉而調患濟急雖罄囊不靳堂姪志奎七歲失怙與孀母居貧甚著假舍處之躬親教養迄於成立里人姜某因貧將鬻妻立出金償所受聘妻得不去復予資本使謀生計不責償其存心之厚赴義之勇類如此課子孫讀書甚力嘗曰人必讀書始識爲人之道科名其細也以歲貢銓壽張訓導經理學校誨諸生每以先行後文相敦勸子志敏嗣

趙志敏字遜齋增生素不喜佛老俗遇親喪多延僧道以爲孝愀然曰是目其親爲何如人也作諭以解其惑父著司鐸壽張致仕

將行疾革因縛牀爲輿徒步從歸父獲終正寢與弟同居終身不
析箸兩姊貧歲分財粟又嘗捐修文廟爲之倡首子長齡由翰林
累陞至山西巡撫

紀之從字巽甫號忍堂康熙乙未進士候選知縣以兄之健宦京
師弟之復之仁和任在籍養親不仕時稱爲篤行君子

林之佳增生貧夔力學能以色養怡親志父彬司訓蒙陰卒於官
之佳鬻田產奔喪扶櫬歸葬見者酸惻母年踰九十孺慕依依奉
甘旨不乏問業於兄之幹凜然若嚴師稱孝友者人無間然

許惟訥字緘菴廩生少孤事母能將以愉婉以母春秋高不肯友
教四方常以未得顯揚爲恨人言有古孝子風

馬振文字魁南歲貢家素窳父隨任江南卒於旅次振文於數千
里外扶柩間關哀動行路乃歸葬焉事繼母以孝稱待諸父諸母

利津縣志

孝友列傳第一

一一

卷八

昆弟子姪亦恒以所得束脩贍其不逮

紀夢祥字紉占候選州同父之健以侍御官京師十餘年夢祥在
籍代父事王母無愆子職非公事不接長吏有澹臺子風焉

王繩先字箕遠拔貢生性至孝不樂仕教授養親後生輩有材可
造而貧者不計束儀及門得第者不下數十人

紀夢傳之復之子字築巖考授縣丞少失恃刻苦爲文年十七補
生員隨任仁和事繼母與諸母以孝邑有興作倡捐必盡力焉有
詩稿藏於家

紀任之健之孫字道遠太學生早喪父事寡母色養並隆兄位亦
早卒與嫂分理家政一治內一治外雍睦可風爲姪懷恩延師授
業視之如子邦族稱之

馬智生員振文子資性純孝事親能察形聲色養無間會應試歸

而母亡一慟幾殞父寢疾嘗糞而甘禱天請代事繼母尤篤人無間言當事聞而旌獎

隆萬里字鵬程庠生奉親孝不以貧從菲侍母疾及喪盡志盡哀以父在勉進粥以自存一夜火發延及柩室救焚者力苦難施萬里乃被髮徒跣號而入將以身殉而所至火疑自熄柩得無恙萬里父克賢武生年百歲而強世以爲篤孝之報

尹蘭貧民目不知書而至性絕人事父孝供甘脆視其所欲父病危無以具棺衾與妻謀將鬻其子鄉人聞而止之釀金爲輶以殯以葬後益困爲人傭每歸必先詣墓哭拜行路爲之慘悽

劉永祚字裕昆歲貢生事繼母能孝謹撫弟友愛操履清潔晚年結廬城陰不履城市有隱君子風

蓋玠贊禮生父治烜增生早逝玠數歲嚶嚶而泣禮拜如成人母

利津縣志

孝友列傳第一

三

卷八

魏氏故孀也貧而能養母病延醫數百里外籲天祈代及喪哀毀幾絕士民共舉孝行濟東道張邑侯李給扁旌之

劉潤字德玉幼孤貧性純孝遇時食必竭力奉母不能致輒垂涕泣每預賓筵有母所未食者不忍舉箸曰吾母尙未嘗也母卒飲食必祭孺慕終其身敦義氣會歲饑鄉民借官穀三十餘石力不能償者代還諸官

張士賢號雪亭志奇士英之弟累試不第母傳樂家居士賢承歡盡力居母喪廬墓一年處鄉坦易好施時有善士之目

趙志鬻字序堂候選布政司經歷嘉慶初隨父華之新甯任會賊張甚而邑當其衝練勇守陴七八年之間數瀕危險志鬻弗忍一日去側亂已或勸之仕則曰天倫足樂不以簪組爲榮也父致仕歸艱步履志鬻侍奉靡間昕夕父喪哀戚盡禮逾歲亦卒

郭誠字長元庠生父老喪明先意承奉後明復如初羣謂孝德所致先世有田數十畝在霑化界族人久種不歸誠卽立契予之趙志甲字芸臺志鬻弟庠生父官新寧兄隨侍志甲奉母於家值教匪之亂有訛言城陷父歿者聞之卽欲往人謂戎馬擾攘間恐罹禍必勿往毅然曰父爲忠臣子獨不得爲孝子耶竟行不願援例授河南睢州州判興利祛弊接運臨清船米倉吏船丁無敢上下其手睢州水災賑飢民數十百衆獲沾實惠後遭父喪歸以母年高遂乞終養焉

王岱巖附貢四歲喪母見羣兒呼母卽號泣事繼母庶母能悅其志父病足二十餘年按摩不違左右父乘肩輿出必徒步隨父歿哀毀骨立喪葬無愆禮家人欲析產不得已取其礲者人以薛包比之異母妹貧割田宅與之方屬續以指書孝友居家忠厚處世八字示孫等

利津縣志

孝友列傳第一

四

卷八

任安幼失恃孝事繼母一嚮之味不進不敢嘗妹貧甚爲置田晦後妹歿育其子女婚嫁之繼母生二子一女雖別居仍月給粟帛後病累載嘗自誓曰吾雖行乞必贍吾母也易簣時囑子善事王母貲財必分諸妹卒後繼母附棺大呼孝兒頓踣復蘇鄉里哀之郭培字因篤誠之次孫夙承家訓田畝悉讓於兄舌耕奉養有祖風焉培成歲貢祖孫父子叔侄皆明經

張文達字尹甫拔貢爲文筆不加點千言立就書法得趙松雪之神由謄錄議叙不樂風塵吏就教職銓卽墨教諭與諸生砥礪學行士風曰上奉母板輿未卽往逾年母病乳癰未之知也一夜心動卽曰告歸歸則晝夜侍湯液不解衣帶者五閱月母卒哀不勝喪由是成疾未數年亦卒子銓

綦渭綦家夾河人太學生父早卒母弟七人祖以諸孫衆多令析居渭由是輟讀爲族人傭賈取值以奉祖及母祖歿送終有禮乾隆丙午大饑諸弟困苦不堪乃商於舖主人假傭值以贍之一家得飽後臨母喪渭獨經營棺衾豐備閭里紛爭渭至數言是非立判衆皆誠服邑宰亦頗聞之時間其存歿云

季雲揚字夏巒元昌之子叔父元儒早卒無子叔母張氏撫雲揚爲嗣雲揚至孝事嗣母如所生初應童子試得嘔血病母張鑒夫攻苦致疾命改就武一試入庠然性悅經史尤嗜東坡詩集依然儒生也當咸豐之初逆匪踞連鎮高唐縣人相驚以風鶴雲揚倡捐守具練壯丁爲禦賊計勤勞臻至歲乙卯黃水爲患捐貲作隄堰鄆邑西偏以是數載無他患又置義田一區使塚墓之被決者遷焉季氏祖塋亦別營隙地改座之後邑令姜廣颺以旱蝗四起

利津縣志

孝友列傳第一

五

卷八

屬雲揚主賑撫事雲揚竭心計畫用不足以私財濟之姜每歎以爲難其樂於施濟多類是者張氏以苦節終身獲

旌建坊入祀雲揚家無餘貲唯存質庫一所可他售以供其費親族咸謂之曰此食用所資未可輕棄子缺於力盍俟後人雲揚曰貧富命也吾惜此區區而致湮吾母之節行吾其何以爲人子卽售之以其資立綽楔壯其觀親既歿遇忌日輒哭於墓同治戊辰年六十四卒

張鳳第字桐旭生三日而孤侍母養於外王父母卒千里舁柩歸食必奠寢必依無異存時養世母紀氏至歿乃已持家儉而有禮雅愛讀書尤喜呂子新吾之書每手錄以教家人課子以嚴命問業於鄉先達子廷璿廷璣廷珣俱名成有聲仲子廷璣字麗斗廩貢以孝友稱兄寢病藥無效乃禱宗祠請代兄病良已居恒以父

兄之教教子姪父卒後每時節猶呼子姪輩於靈帷側講經義述祖訓焉鄉後進之來學者多成就之著有野居課餘錄貽子家規般陽詩草存於家卒年七十二繼子廷珣字佩東庠生二兄館於外廷珣家居奉父母能曲體志意侍父母疾未嘗解衣帶及歿泣不勝悲敬二兄誨子姪一如廷璣著書經批解及雜體詩草卒年七十五廷璣長子葆恩字守泉有文翰同治甲子順天舉人父老病股艱行步六年竭力以事授生徒因其教成名者相望卒年四十六

宮其順字運隆少失母繼母遇之苛恒曲意順之而對父諱言母感而悟母卒父再娶母遇之亦如前繼母父卒事母彌恭母寢病時奉湯藥於左右母曰吾今乃知若之賢矣惜吾病革矣尋卒其順又以祖譜失修訂遺補墜成之以繼父志

李保和字泰運儒童孝稱於閭里母病殆保和雪夜跣足踞於庭顛天虔禱翼曰母少瘥思食鮮魚會大風渡河於市上得鮮鯉急歸風濤愈險舟覆遂溺死妻戴氏懼母聞潛使人買魚奉之未幾事泄母悲號不已數日尋殂

李啟賢字汲滋道光元年由增生舉孝廉方正時啟賢父文桂知德慶州緣事謫戍西陲啟賢隻身往隨備歷艱辛至迪化戍所八年秋文桂赦歸里啟賢綜家政居憂悉如古禮弟佐賢守汀州屢迎致之卒不往惟語以清白居官無以家事置念處鄉黨有貸必應邑宰普恒廉吏也罷官淹於省會邑人士醵錢贈資斧啟賢始終經紀之又與紳士表章節孝三百餘人咸豐三年選曹縣訓導未任卒

張廷璿字次之歲貢生有至性事親以和愉不以貧缺所養母患

癱疾卧床簣家無婢媪廷璫扶掖溲便洗滌穢污歷二十年無稍易親歿葬祭以禮事諸季父盡力嘗適市拾遺金急覓其人還之無德色署招遠教諭補費縣訓導立教士規能扶風化光緒元年邑令甯炳文舉爲孝廉方正未赴考而卒

林玉樹太學生弟寶樹俱性敦篤有節概少事二親貧能供菽水親病醫罔效禱于神願捐已算益親年病果瘳迨親既歿哀毀盡禮中年家稍豐閭里婚喪取求必應濟人無伐施羣謂爲仁人兄弟友于最篤兄出未歸弟不食不寢坐以俟弟出兄亦然其後子姓蕃庶兄弟議析之不謀親族部署悉定及旣析矣而通有無緩急如故無分爾我焉邦人贈以扁曰怡怡堂不受至今人猶述之崔金藻字馥亭國學生事繼母有孝思甚愛諸弟寢食必偕俾從師就學弟有過差則涕泣不食俟其自艾乃已後弟玉藻鴻藻鳳藻游庠入監有仕者金藻調急濟乏義行悅於里黨教諭吳以額獎之曰孝友可風

劉大法字洪範太學生孝行著聞母李患痿痺日夜侍飲食湯藥久之母憫其瘁曰吾疾難遽除焉可以吾而廢爾業耶大法泣曰兒祇願侍母他不遑恤也蓋十五年如一日云

曹逢春與弟繡春友愛甚厚終身不析炊勉弟力學貧不恡質繡春入庠爲增生事兄尤敬而有禮每進甘美必共食怡怡如也鄉隣有事皆殫力焉

志曰世有勲業不必高文學不必優門閥不必顯而一念之誠足以千古者其惟孝乎李端六齡代父戍可稱奇男子趙罔以救父殲於賊吾尤悲之刲股之孝近於愚以及侍疾嘗糞似黔婁伏棺叫呼似蔡順並稱純至不離其親者則紀之從許維訥紀夢祥若

而人切於孺慕者則尹蘭劉潤張鳳第若而人孝義則許棠趙著
趙志敏李啟賢季雲揚張廷璿若而人孝友則林之佳馬振文紀
任王岱巖任安綦渭林玉樹兄弟崔金藻若而人行狀多端約言
其概如此嗟夫三代下論孝好名者往往色取之而其實卒不可
知茲乃宗族稱孝如一揆焉自非錫類無慚惡能有是哉

義行列傳第二

王廷輔仁義鄉人其爲人行事不詳明景泰四年歲大饑時以議賑亟勸貸於民廷輔助之粟五百石巡撫嘉其尚義予以冠帶榮身

韓士名望營鄉人景泰間修築縣城闔邑共修城三面士名獨修城北一面時稱誼士

張尙志望營鄉人行誼醇樸母疾數月不解襟帶崇義樂施每解推衣食戚鄰王守義劉信貧不能葬爲經紀之有劉崇諸人常寄食其家賀天福凶年鬻女旣而還之又令其子闔出所食餼創義倉以贍厥宗會疫疾盛發死亡者踵接尙志捨棺棺之義聲著焉盜有窺其鄉者義之相顧曰莫驚此老翁嫗也知縣馮執中聞其名卽以賔延之以風海邑并給扁額云

利津縣志

義行列傳第一

卷八

李從章字存儒廩貢考授州同崇義好施其師林森與友呂相明死葬之築舍於城東南名曰柳莊延名師集遠近學者會文其中做科場例甲乙之多取青紫去子某孫某亦能繼厥美振拔單寒之士孔博士顏其廬曰世德從章之子暨孫曾爲廣文者二貢一諸生五太學生六世德之報固有然也

許大成字孔奇增生文辭詩賦俱有名捐俟選州同其先世嘗製文廟禮器久而殘缺復大出貲重修之堂姪振生舊遊於外大成罄千餘金尋歸本籍爲叔嗣析產予之族鄰咸服其誼

李廣生以例貢考授州同方正孝友最卹寒士輒助燈火資赴試者餽之贖康熙歲大歉出粟數十石周姻族之急以子愉得贈典趙士驥字德齋以增監考授州同爲人尙氣義建義學義倉修學宮儒林坊皆樂於倡始至於病施葯歿施棺婚予財尤其常事

紀煜字淑子捐貢候選主簿鄉飲介賔好施予里黨恒資其惠邑之大工如宣聖廟文昌閣關帝廟城隍廟洪濟寺普濟堂與義學皆其所倡建費逾千金又獨修通濟橋置義塚總督王士俊以誠心慕善扁其門

趙瑾字懷玉俊監捐州同職三世於臘節舍粥捐金修普濟堂總制王扁其門曰誠心好善

胡亨字長清俊監遇凶年多死者施以棺其尋常救濟尤夥鄉人咸誼之

黃建極字位中年十六爲諸生敦行好善鄉人有過舉常恐建極知里鄙稱貸不償亦不問有不能葬者輒助貲歛歲買奴婢及歲豐焚其券而還之與弟分產爭取下分有交讓風聞者兩美之魏陞字揆百由俊監取教習嘗監修明倫堂洪濟寺又自出貲修普濟橋途人便之

利津縣志

義行列傳第一

二

卷八

張揆字藻庭成童補弟子員甲午舉賢書性孝友母病劇禱神祇請代翼曰母霍然愈津之新開口舊無渡揆父庠生誨允嘗設義渡歲久舟沉揆承父志復造舟行人稱便揆有姊早寡遺孤在襁裸揆慨然曰此吾責也迎之家以養以教後姊執苦節五十餘年得

旨褒旌甥列鬢序皆揆力也有僕女及笄召其父任其婚嫁不索直其人感恩去至其振乏絕助喪葬殆難悉數

李五爵字錫卿從章之孫由例貢授州同好善樂施凡邑中文廟義倉普濟倉等皆率先捐修戚族中貧不能讀書者招至家給膏火延師課之玉成者衆人以爲克肖厥祖云

石憐字涵真恩貢生以家窶艱爲兩弟納室博父母權教授門徒

成材者衆學使喀徐俱以優行聞所著有西村草
胡苓字馨宇捐貢嘗捐修西哲文昌閣及府學棚年饑族戚賴以
全者不勝計知縣毛邑榜其門曰懿德攸好

于鑑字明珍康熙四十八年拾白金百兩卽還遺金者縣令給扁
獎之

崔宏字盛吾孝親信友族人多賴以給餽粥同里有爭端尤善排
解時號長者

趙五倫行事未詳其鄉公舉爲善人邑侯許學博楊共扁其門曰
鄉舉里選

紀璫字晋玉援例捐貢康熙甲辰歲旱蠲粟八百石以濟餓人壬
子捐金設義塾供給無所缺修葺學宮出資倡首時論多之

紀文圻字甸菴貢生煜子勇於爲義督修學宮文昌閣關帝城隍

利津縣志

義行列傳第一

三

卷八

三皇等廟並營義塚經費或獨捐或共捐皆無恹色載碑記

黃克述字憲宗四歲而孤與母兄居事母綦氏以孝聞性嗜學貧
無所得書嘗從人借讀邑長者見而奇之資以膏火入庠食廩卒
不利於進取因以所學教人其教以行爲先文爲次贅脩所贏每
濟人之急意豁如也晚歲業進自以生平所爲多不愜作百勿堂
以示及門年六十卒人思之爲買田供時祭焉

張佐字輔平父心孔垂老病亟佐祈天誓以已代親時僅十二齡
耳其篤孝已如此居鄉里善息紛爭贍侄居仁少長多口二十餘
年矣卒以爲非長計予之產有田有宅焉族孫莒貧不自存收恤
之爲成室焉有司醮趙公累於民欠不能去官佐爲代償趙德之
去置義渡大清河口媼族勾貸必應卒年七十二

劉毓桐字成雲候選主簿好施成美能息紛爭津城故爲土築壞

已久邑令程士範請帑更修易土以甃使毓桐總司會計毓桐精
覈稽一無苟且始乾隆丁亥迄庚寅事乃蒞程手書君子堂顏其
室

王時掄字際斯太學生性倜儻勇於赴義乾隆初有梟匪數千聚
於霑化之富國鎮將掠永阜場鹽坨時掄聞之騎青牛夜抵賊所
陳說利害賊散去乾隆丁未冬有

欽使至查辦鹺務時掄以利邑鹽少請撥天津鹽接濟條陳數百言切
中肯綮商民賴之嘗獨修莊科龍王廟倡修學宮蟬螻嘴蕭聖祠
皆有碑記

胡佺字軒舉居於家樂成後學嘉慶間

恩賜舉人多義舉凡廟殘路缺類皆倡率修補東津渡口商旅往來孔
道也舊岸傾圮佺邀同志出資購地遂成通衢行旅賴之

利津縣志

義行列傳第一

四

卷八

劉旭字旣白性仁孝見義必爲邑關帝廟燬於火旭倡衆重修文
廟亦多所葺補皆有碑誌官從九品

王光漢邑增生性忼爽工書家慕貧雖日不舉火無戚戚容嘗書
忠孝節義四字刊石置於明倫堂側

張於畿字化都由貢捐中書出俸資倡修山左會館有范舉人歿
於京師爲之斂復助之歸里人仰其義後用同知

王克恭字敬齋時掄孫貢生授職州同乾隆丙午歲稔散穀數百
石按戶分支嘉慶癸亥河決又出積粟調之庚午大旱以逋累鬻
子女者十數人爲償所負子女得全戚里有不能婚葬者厚助之
無慮二百餘家每冬春門外設粥廠令二僕日飼饑民又嘗代完
一村租賦不償亦不索納稼時各地段留少許令貧民獲滯穗之
利邵家坡莊田養牛數頭任人驅役又嘗設義塾招族鄰無力誦

讀者延師訓課給脩火貲他若建宗祠修祖塋築河堤作廟宇尤不勝計遐邇皆稱王善人卒之曰里人徒跣奔泣爲之罷舂季元昌字振西太學生治家嚴而有則事繼母高淑人老而彌篤族黨中有爭競者片言立解無力婚葬之家攸助之貸不能償卽燔其券有異鄉友死不能歸葬力爲之所歲薦饑出其蓄以賑鄉里比卒會葬者多稱特盛焉

張於殿字振邦布政司理問職平生樂善濟人之乏凡修橋路必倡捐成美以利行人河水秋溢恒出橐中資勸築堤防以衛田畝年六十七卒

高華字文典太學生道光丙戌捐金千餘兩獨修文廟前太和元氣坊及宮牆立石紀之學使吳慈鶴給扁曰光儀坊表

蓋嘉賓字萬曉乾隆壬申武舉有義氣歲荒振困阨凡數十家訓

利津縣志

義行列傳第一

五

卷八

子弟以端謹里人咸敬畏之推爲模範

高容華字重巍性嚴毅持家有法人有佚行每面責之教弟容聲孫貢齡讀書苦心勸勉不少假藉故人之因嚴憚而立成者甚夥而其弟與孫亦先後俱成進士通有無緩急處以固然不復置念八十四終

高容閣字丹華太學生性質直爽慨好爲解推道光丙申歲侵由海口買糧一艘道逢貧者乞援升斗數給之比至家僅存其半亦卽分濟族鄰邑之廟宇橋壩諸工作先解橐爲衆倡尤善決疑解紛不煩辭費人多仰之

隆進賢字良弼監生捐縣丞有內行樂推所有爲善不倦捐穀實倉輸金繕學宮雍正九年大侵煮粥濟饑出家廩減價平糶全活無算妻之從子李維柟生未週歲父死母嫁進賢收養之爲之取

婦生子置產業焉

劉德寬字惠溥業儒未就幼酷貧事母孝後漸殷實卽雇濟人利物之心夏施茶瓜冬施綿衣鄰里親舊吉凶禮不具者力助之生平樂善之事難更僕數

陳潔監生多財好義海口蕭聖廟地苦卑濕頻侵于水潔倡施多金重構殿宇壯於舊規二十四年三十三年海潮大災拯活大小男女五百餘人

程光前字榮先性樸茂樂施與里故瘠貧子弟秀者往往以無力罷讀光前慨然曰置義塾延經師是吾事也未就而卒切切以遺命屬其子子三曰偉曰儒曰儉合力勸建以承先志

李愷業鹽賈雍正十三年捐地六十畝入普濟堂當道給扁示旌劉長齡字康久庠生嘉慶間河水溢邑西關外街衢皆爲巨浸長齡獨捐大木數百成輿梁人不病涉與兄庠生元會倡修明倫堂塑四配像龕閣一新其城郭堤壩之工悉同諸紳捐費修築知縣王天錫顏其門曰年高德邵

趙長清字澄溪庠生性直諒重行誼任事必殫力圖終尤諳興作之務邑文廟傾圯紳民集貲二萬餘緡將作新之以長清篤確有守使總出納節用督工不恤勞怨閱六載成之廟貌巍峩爲合郡冠邑令宋以功昭泮壁顏其門咸豐癸丑粵逆竄連鎮利邑相距密邇城壞不可守長清獨任搶築之役後以監修護城石壩感風邁疾卒

紀渤恩貢生有文學樂善急公會有修文廟之役與同邑趙志敏倡捐邀紳耆趙長清李泚等籌費鳩工遂告成焉又文昌閣奎壁樓城隍廟通濟橋揚惠橋及護城石壩各工皆其所經理孫大司

農瑞珍顏其門曰鬻宮永賴邑令孫慧愷贈額曰磊落光明鄉飲
舉大庾年八十七歲終

岳吉士字藹如先世爲宋忠武王裔始遷祖東常爲紹忠侯雷十
八代孫六傳至吉士爲諸生連不得志於有司爲人重大節謹細
行履跡不入公門鄉人有曲直皆往質焉輒以一言息其訟乾隆
四十七年海潮傷稼戶困於賦多逃亡村人以田券求售留其券
悉厚賙之復邀衆白於官事上聞因免其租越數年田耕歲稔亡
者復歸乃焚券而反其田里之中有因貧鬻妻者吉士助之錢米
妻以是不去教子鎮東鎮南俱成進士封典各如其官

王華清鳴鴻之子太學生捐正九品樂於爲善以前明以還譜牒
已失乃立石先塋詳鐫世系堂兄際清晚歲家落遂割地二十餘
畝與之養生送死悉資焉嘉慶初歲歉風雪累日鄉人多饑凍者

利津縣志

義行列傳第一

七

卷八

一一 賙之至其助婚賻葬之事尤不勝書

牛次暘字曰乂太學生性慷慨急公上義嘉慶八年河溢邑大饑
次暘賙救窮乏鄉閭感惠郡司馬劉大紳奉命發賑次暘助賑有
力劉公嘉其勞欲以善人題其門固讓不受卒年四十九

張國清字福平善行於一鄉祠宇道路率倡義修之又捐施地基
濬爲井泉汲者資其利里人紀以碑舉人劉遇春爲作記

張成賢字德厚兄弟讀書自力耕以供膏火析爨時以腴田讓兄
弟父母養葬身獨任之由是以友悌聞與鄉人處勸善規過居間
排難 能使里人化爭爲和自奉極菲有餘輒以振乏道光間歲
荒救濟無算尤喜人子弟讀書恒爲貧者出修脯購筆硯士論多
之

張聿修字善果太學生成賢仲子績學不遇因督二子勤讀俱入

邑學從叔母王貧無子爲營居供米薪至十餘年沒葬祭以禮咸豐間村罹黃水災乃結廬數十椽聚貧者居之同治間有劉氏子來甘爲傭一年不受值聿修不忍詰其由乃言其父少時貧無以娶嘗資錢數十緡今將以身償舊負耳其施不望報多此類兼工醫術精痘疹科有請必赴不憚行路之瘠亦不受謝與人接時有勸規人藉以薰善良云

李泚字蜀江太學生性謹密誠篤任事不憚其艱邑文廟圯紳民集捐欸二萬餘緡重新之邑令使泚督工役筦出納逾六寒暑不怠會累歲河溢補築護城石壩實董其役東南城陷於河河水內灌將修堤禦水土無所得泚乃掘其宅基之土而輸之工城內遂安

高永本字貞一太學生友於諸弟恂恂和易尤好解推鄉閭有急

利津縣志

義行列傳第一

八

卷八

與嫁娶喪葬之無力者輒捐金不惜亦無矜容凡諸義舉有請必應道光己酉邑修學宮永本捐錢八百緡例得議叙不受咸豐甲寅歲大侵出粟數百石濟餓人生全者多衆德之咸爲納券永本亦不之拒越四載召家人矢之曰積財能散此吾分也濫利胡爲者今取諸券悉焚之吾子孫世世其毋得言其厚誼如此既歿子孫猶守其遺風焉

成松森字叢林捐從九品性豁達志在利物邑泐書院倡義輸貲光緒初洊饑捐米施粥無所慙卒年七十太史王會英爲作墓銘兄松園太學生軍功七品銜葺河堤村人感頌以保障功高顏其廬

崔玉藻字馨浦增貢生能順於繼母和兄弟剛毅能任事會咸豐壬子海溢災爲甚沿海州邑大侵玉藻以狀聞於當道於是修復

灘池以工代賑有產無產之家俱獲安處撫軍丁賜之扁曰利濟通綱知縣甯復以樂善好義扁旌之

于雯錦字綺瞻例貢父獲祥字麟書性豪邁里中窮乏恒有施濟分遺產於諸弟以姑之子某無恒產亦分予之其厚德率如此雯錦行肖厥父嘗收乞人女爲己女厚治奩而嫁之女寡復來就養雯錦終善視之潘某賈人也貧無貲因其乞助白金三百家由是豐其他葬予棺婚予財之事不具書子二清溪庠生清和太學生孫雲梯廩生雲橋庠生雲村武庠生

趙蘭英字紉秋附貢生鄉飲大賔性耿介善醫治疾施藥物不受報倡修河堤廟橋等工會邑戒嚴督勇守河千製攻守具募捐不足貲財幾爲之罄感其澤者以德被鄉梓扁額贈之

趙維墉字崇垣華之曾孫附貢候選訓導性慨爽咸豐初鼎新文

利津縣志

義行列傳第一

九

卷八

廟維墉勸捐督葺迄於有成治團練繕城垣皆能任其勞怨歲丙辰與紳耆籌款築壩禦水悉合機勢以團防議叙軍功六品

志曰古昔之世睦婣任恤尙已今人羨餘自擁秦越視人之阨急風俗所以鄙薄也司馬氏叙傳雖游俠亦登蓋有憂焉所惜者義行蔑有耳夫饑與之食寒與之衣疾與之藥歿與之棺婚與之財學與之膏火與夫割田產輸工需而又不求名不冀報焉豈非烈丈夫之行哉故於東津義士之流凡宜書莫不書之以爲後起者

勸

隱逸列傳第三

石嶧字南瞻歲貢爲人視聽言動皆不苟成就後學無算終於家居選館陶訓導不就

宮國瑾字涵璞歲貢行孤介不希仕進作迂拙自序以子文雅貴贈文林郎

趙瑜字伯握由增生捐貢隱處不仕寒暑閉門唯事文史著有詩集有疑必問卽時登記謙以受益尤人所難

張敕字鸞書志奇子爲人樂易工詩善書獨居授徒酷貧終不形乞媚狀與惠民李衍孫善季子振翀能養志暮歲得温飽壽八十八終

魏申錫字方來廩貢性冲淡無宦情喜購書曰講誦性理五子近思錄等書尤嗜莊列自號無方居士著有無方居士遺詩王世勳

有傳

利津縣志

隱逸列傳第三

一

卷八

李上賢字希亭子癡其號也性穎邁淡於榮祿不應試以布衣老能爲詩古文詞善書畫片楮尺縑大爲時人所寶詩稿未梓從弟佐賢爲選百餘首刻於武定詩續鈔

志曰士以隱逸名非曰逃蓬茅茹薇蕨也然其砥節厲行安身順遇鴻毛視萬物亦可以自高焉石嶧宮國瑾趙瑜張敕李上賢或屏迹邱園或潛心竹素或旁及書畫之事迹其懷抱幽貞儻所謂遯世无悶者非耶

仙蹟列傳第四

李登仙仁義鄉一圖人字見田幼好談元講易通康節數學諸書長遊四方逢異人秘授眞法卒其業心旣頓靈言言奇中嘗之晉與太史朱滄起交爲指示何方吉何方得全比逆闖變起合如符契朱氏因免禍爲作異人傳行於世都督田宏遇耳其名聘之至會流寇掠河陝諸省曰使人馳數百里報軍中狀登仙曰安用是今日寇攻某城擊某處我兵爲勝爲負悉當不爽報至果如其言田欲聞其名於上不可迨

國朝定鼎客都下一宦家宦病疫思啗鮮橘時南北未一勢非飛仙不能致乃旣一室焚香枯坐詰旦卽捧橘出蒂葉如初摘然晚歲體益健雙瞳炯炯而出口詩文意到輒筆不停書甲午秋闈試有日偶在朱學使座中口占云有田皆種玉無馬不成龍及榜發則解首爲田玉魁選有馬成龍也其前知率類此生平救濟多人不可稱數歲壬子二月忽謂其後人曰三月一日乃吾辭世時矣先一日猶浩歌言笑如恒時子孫以術學請但曰厚德傳家天根月窟之理亦繇人自悟耳遂卒年八十有二登仙意落落不修威儀時而美袍服時而敝衣冠時而冬葛夏裘露頂跣足入讌會自若也故人呼之曰李神仙王文安公李宗尼皆有贈詩

志曰余向考神仙之說如所謂金丹玉漿長生之事迄無驗者審若是宜無神仙矣而隱晦同塵如東方曼倩之流亞亦稱爲神仙然則神仙固自有眞與登仙數往知來迹人而行天是得神仙之三昧者字曰見田或潛或躍焉咄咄李君其猶龍乎